



REPUBLIKA E KOSOVËS

KUVENDI I KOMUNËS – VUSHTRRI

PROCESVERBAL
NGA MBLEDHJA E VII E RREGULLT E KUVENDIT TË KOMUNËS SË
VUSHTRRISË, MBAJTUR MË 25 KORRIK, 2024

Mbledhja është mbajtur në sallën e Kuvendit të Komunës së Vushtrrisë, duke filluar në orën **10:23**. Në këtë mbledhje ishin të pranishëm anëtarët e Kuvendit të Komunës së Vushtrrisë: Adnan Lahu, Alban Bajrami, Agim Bregaj, Agron Përçuku, Ali Januzi, Arlind Gogolli, Basri Menxhiqi, Behar Duraku, Bekim Zabërgja, Blerina Shala, Bujar Pllana, Edona Gashi, Faton Hyseni, Leonora Gërguri, Gentiana Rama, Gresa Muli, Kushtrim Hyseni, Fakete Dushi, Fatmire Cecelia, Jeton Gjaka, Refik Maloku, Melihate Basholli-Latifi, Mek Selaci, Mensur Kasumi, Mensur Kastrati, Mentor Hasani, Mentor Ferizi, Nasuf Aliu, Nurten Çerkezi-Gjyshinca, Spasoje Stefanoviç, Shkelzen Xhaferi, Sylejman Meholli, Ymer Haradinaj dhe Zojë Hajrizi.

Mungoi: Nurie Halili.

Mbledhjen e hapi dhe e kryesoi Melihate Basholli-Latifi, Kryesuese e Kuvendit, e cila konstatoi se në sallë janë prezent 34 anëtarë të kuvendit, kuorum i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z. Ferit Idrizi, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Melihate Basholli-Latifi, kryesuese e kuvendit- në fillim të mbledhjes njoftoi kuvendin për materialet e pikave shtesë, që do të trajtohen për shqyrtim në rendin e ditës.

Ferit Idrizi, kryetar i komunës, pasi i përshëndeti të pranishmit deklaroi se propozon që të tërhiqen nga rendi i ditës dy pika dhe atë pika 11 në renditje, Propozim-vendimi lidhur dhe dhënien në shfrytëzim afatgjatë të pronës së paluajtshme të komunës në Parkun Industrial në fshatin Lumadh, si dhe pika tjetër propozim-vendimi për dhënien në shfrytëzim afatgjatë të pronës së paluajtshme të komunës në Parkun Qyqavica. Arsyet për tërheqjen e këtyre pikave nga rendi i ditës është për fatin se me datën 22 korrik 2024 e kemi pranuar në adresën elektronike nga Prokuroria Speciale e Kosovës ku është kërkuar që përfaqësuesi i komunës të ballafaqohet me kontratën e nënshkruar për dhënien e pronës komunale në shfrytëzim afatgjatë në Parkun Industrial në Lumadh. Prandaj me qëllim që të spastrohet kjo çështje në tërësi, kërkoj që kjo pikë të largohet nga diskutimi dhe votimi në kuvend. Sa i përket “pikës” për Parkun Qyqavica, sot në ora 14:00 në cilësinë e anëtarit të komisionit ndërministror është i ftuar në takim ku do të diskutohet çështja e

qirasë dhe ajo e përqindjes së përfitimit që komuna e Vushtrrisë kërkon dhe insiston ta ketë në këtë investim strategjik.

Adnan Lahu, anëtar i kuvendit- pasi i përshëndeti të pranishmit deklaroi: para më shumë se dy muajsh në këtë foltore e kemi ngritur si shqetësim draft-raportin e auditorit të jashtëm për Komunën e Vushtrrisë, por Kryetarin më shumë e shqetësonte se si ne opozita e kishim informatën mbi këtë raport se sa vet raporti. Sot, prap në këtë foltore, po vërtetohen ato që i kemi thënë në lidhje me raportin e Auditorit. Gjithsej 27-të të gjetura, ku prej tyre 18-të janë të gjetura të përsëritura dhe 9 të gjetura të reja, pra lëre që nuk janë përmirësuar të gjeturat që komuna ka pasur edhe në vitet e kaluar, por sot kemi edhe 9 të gjetura të reja. Të dashur qytetarë të Vushtrrisë, në 24 vitet e fundit, ky është raporti më i keq që ka marrë ndonjëherë komuna e Vushtrrisë, duke na dëshmuar që edhe kjo qeverisje është qeverisja më e dobët që kemi pasur ndonjëherë. Në një intervistë televizive Kryetar, duke e cilësuar veten si trajner keni deklaruar se trajneri i mirë i ndërron shpesh lojtarët, mirëpo trajneri i mirë tregon edhe rezultate, e në rastin e juaj rezultatet janë shumë të dobëta dhe kur rezultatet janë të dobëta duhet të ndërrohet edhe trajneri. Shkeljet në këtë raport kanë qenë aq serioze sa që nuk keni arritur ta largoni as edhe një të gjetur të vetme. Punëtorët të cilët kanë qenë në administratën komunale po transferohen në institucione tjera, ata që kanë mbetur i keni avancuar në pozita udhëheqëse si shefa të sektorëve të ndryshëm, ndërsa punësimet e reja i keni bërë në baza partiake dhe pa meritokraci, andaj po ju mungojnë rezultatet. E keni plotë gojën Diasporë dhe nuk keni bërë asgjë që diaspora t'i shijoi ato pak ditë në vendlindjen e tyre. Nëse kaloni në shesh e shihni se e keni gati të pamundur që edhe të ecni në të, e keni bllokuar sheshin kryetar, e kemi parasysh që në një pjesë të sheshit janë duke u kryer punime, por edhe atë pjesën e lirë që është dashtë ta shfrytëzojnë qytetarët e keni bllokuar. Për më shumë se një muaj, ka rrjedhje të ujit të pijshëm në shesh, në këtë vapë qytetarët kanë problem për ujë të pijshëm ndërsa uji i pijshëm rrjedh në shesh. I pastronit rrugët edhe atëherë kur kishte reshje shiu, ndërsa sot në këto ditë të nxehta vere rrugët nuk pastrohen. Rrugët i keni bërë projekte tri vjeçare, duke mos përfunduar asnjërën, e kuptojmë që këto rrugë keni dëshirë ti përruroni në vitin e ardhshëm, sepse është vit zgjedhor, por kjo gjendje është bërë e pa përbalueshme për qytetarët. Në fund tha se, katandisja që e ka kapluar Qytetin e Vushtrrisë ka bërë që edhe në fshatrat më të afërta kolona shkakton vonesa deri në një orë, për shkak të demolimit të rrugëve.

Sylejman Mehulli, anëtar i kuvendit-pasi i përshëndeti të pranishmit deklaroi se foltorja e kuvendit është vendi më ideal që të shfrytëzohet nga ana e kryetarit të komunës për të iu kërkuar falje qytetarëve të Komunës së Vushtrrisë për të gjitha këto përjetime të këqija që janë duke i përjetuar sidomos këtë periudhën e fundit. Kjo faktehet duke filluar nga sheshit i qytetit, ku kryetari e ka prezantuar si mega projekt, ndërsa duhet kërkuar falje qytetarëve për gjendjen kaotike që është krijuar në atë shesh. Një qeverisje që vjen pikërisht nga partia aktuale në pushtet, që para dhjetë viteve kishte investuar milion para në atë shesh, pas dhjetë viteve po e njëjta parti dhe qeverisje investon kaq shumë para për një shesh i cili është dashur të jetë i përfunduar, në ndërkohë që të gjitha ato biznese që shtrihen përgjatë këtij sheshi kanë humbej katstrofale biznese si rezultat i keq-qeverisjes aktuale komunale. Tutje shtoj se sheshet prej se ekzistojnë nga Greqia antike e deri me sot e kanë kuptimin, që të gjitha pjesët e qytetit e kanë një qasje bashkëdyzim dhe përbashkohen në një shesh. Qeverisja e kaluar e patë bërë sheshin me disa vazo të betonit që i ngjasonin varrezave të faraonëve, ndërsa tani sheshi është duke u bërë në stilin kinez në stilin e murit kinez, ku qyteti ndahet me mure të betonit. Çfarë kuptimi ka sheshi që e ndan qytetin me mure të larta të betonit kur ai është për qasje të lehtë për të gjithë qytetarët. A ndoshta mos është betoni që po paguhet më mirë për qeverinë apo cila është arsyeja?! – Gjithandej qytetit kemi kaos infrastrukturor, sepse nuk ka rrugë që nuk është prerë asfalti dhe ato nuk kthehen në gjendje të

mëparëshme nga ana e operatorëve ekonomikë. Kemi dëmtim të kanalizimeve dhe përgjithësisht qytetit është shndërruar në një kaos urbanistik. Më pas ngriti shqetësimin se te shtëpia e tij kanalizimi është dal mbi sipërfaqe dhe aty gjendet shkolla dhe një lagje e tërë ku ka rrezik për shfaqje të ndonjë epidemie, por askush nuk merret me këtë çështje. Tregu i prodhueseve vendor është prezantuar nga qeverisja aktuale si mega-projekt si është situata sot kur do të përfundoi ai treg, sepse të njëjtit i është ndërruar lokacioni me dhjetëra herë dhe sot akoma prodhuesi i Vushtrrisë nuk ka zgjidhje se ku do ta shes produktin e tij. Është premtuar plan special për arsimin, cila është gjendja në arsim këtë më së miri na tregon gjendja nga raporti i auditorit me të cilin kryetari është pajtuar. Kemi një politizim të skajshëm të arsimit, keqpërdorim të procedurave të rekrutimit duke iu dhënë apriori përgjigjet kandidatëve të preferuar. Në konkurset ku kërkohen inxhinierë të tekstilit dhe pranohen dizajnerë të artit, në kundërshtim me normativën arsimore. Subvencionimi i OJQ-ve është bërë në kundërshtim me rregulloren e Ministrisë së Financave dhe atë komunale. Mashtrimi i punëtorëve të komunës për shujta, është i pa precedent, sepse kjo çështje nuk është zgjidhur dhe do të jetë vështirë e realizueshme, për shkak të problemeve juridike-mungesës së bazës ligjore. Mungesa e vullnetit për rritjen e subvencioneve për fëmijët e porsalindur, kjo për faktin se edhe komuna më të vogla dhe me buxhet shumë më të limituar janë duke i subvencionuar fëmijët e porsalindur, sepse Komunës dhe udhëheqjes komunale të Vushtrrisë po i mungon vullneti për të zbatuar edhe vendimin paraparak për subvencionim të këtyre fëmijëve me 120 €.

Ymer Haradinaj, anëtar i kuvendit-tha se në këtë seancë të kuvendit është duke munguar Drejtoresha e Drejtorisë së Diasporës, edhe pse këta të fundit i kemi shumë prezent këta muaj. Ajo çka është problematike është fakti se këtë vit nuk kemi vendim për shfrytëzimin e oborreve të shkollave si parkingje për mërgimtarët. Kërkoj që sa më parë të merret ky vendim për lejimin e shfrytëzimit të këtyre parkingjeve.

Fatmire Cecelia, anëtare e kuvendit-ngriti shqetësimin e qytetarëve që po shkaktohet si rezultat i punimeve në rrugët nga hyrja në Vushtrri në drejtim të fshatit Bukosh, dhe përsërit pyetjen e saj se kur pritet përfundimi i këtij projekti në këtë rrugë sepse e njëjta është duke iu bërë shumë dëme qytetarëve të Komunës së Vushtrrisë.

Ferit Idrizi, kryetar i komunës-në adresimin e tij para kuvendit paraqiti sqarime specifike në çështjet e ngritura nga anëtarët e kuvendit, ku theksoi se çështja e raportit të auditorit të përgjithshëm është pikë e rendit të ditës, i cili do të trajtohet gjerë e gjatë në këtë seancë plenare. Ai potencoi se pika qendrore në kualifikimin e raportit është pagesa e mjeteve për mësimdhënësit nga kategoria kapitale në kategorinë e pagave, pagesa të realizuara përmes vendimeve gjyqësore. Kjo ka ndodhur në zbatimin e kontratës kolektive të arsimit, e që mësimdhënësit kanë pasur të drejt në realizimin e të drejtave të tyre. Në këtë kontekst vlerësoi se janë bërë dy dëme kolosale, në njërin anë ministria e ka goditur financiarisht komunën, ndërsa në anë tjetër mësimdhënësit janë dëmtuar nga avokatë me 10% të fitimit. Lidhur me shfrytëzimin e oborreve të shollave për mërgimtarët tanë si parkingje, një vendim i tillë është marr dhe i njëjti është publik. Lidhur me projektin për ndërtimin e sheshit të qytetit, ri-potencoi se qëndron prapa asaj se është një projekt i madh dhe i njëjti është duke u zhvilluar sipas dinamikës. Sa i përket punësimeve sipas vijës politike dhe partiake, theksoj se të gjithë e dinë se nuk është ashtu si po pretendohet sepse një zyrtar që është punësuar në zyrën ligjore të komunës është mikeshë e ish kryetarit të Komunës së Vushtrrisë. Kontrata tre vjeçare për rr. "Drenica" që është një arterie e fuqishme që e zbrazë qytetin, ceku se, është sipas dinamikës dhe standardeve dhe mendon se nga fundi i korrikut do jepet shtresa e parë e asfaltit kësaj rruge. Pastaj shtoi se kjo rrugë bashkë me rrugën nga Pestova në Druar parqet një kompletim të mozaikut të infrastrukturës në shkarkimin e qytetit me rrugë alternative. Më tej,

përpos rrugëve kryesore si ajo për fshatin Begaj, mandej rruga Lumni Surdulli dhe Avni Saraçi, që janë arterie kryesore, është duke shkuar sipas dinamikës edhe projekti Tregu i Qytetit për prodhuesit vendor, ku pjesa më e ndjeshme ajo e parkingut nëntokësor është përfunduar. Te shujtat e punëtorëve të komunës, ka pasur vullnet të plotë që kjo të realizohet, por që një vendim për këtë çështje është kthyer mbrapsht nga ana e MAPL-së.

Adnan Lahu, anëtar i kuvendit-tha se, kryetari i komunës shfaqti vetëm anën politike, por nuk u përgjigj në asnjërën nga temat e ngritura nga anëtarët e kuvendit dhe shtoi se sikur përmbaruesi privat të mos i kishte marr mjetet nga komuna, Komuna dhe qeveria komunale nuk do të kishte se çfarë të prezantonte para qytetarëve sepse mjetet buxhetore të komunës do të shkonin në suficit, dhe në këtë formë po tentohet të mbulohen dështimet e qeverisë komunale që kanë ndodhur në çdo fushë. Pastaj vlerësoi se fakti se raporti i auditorit të përgjithshëm është dërguar bashkë me raportin për të hyrat dhe shpenzimet kjo tregon më së miri se gjërat dhe të gjeturat po tentohen të fshihen.

Sylejman Mehulli, anëtar i kuvendit-vlerësoi se përgjigjet e kryetarit janë sa për ta amortizuar situatën, por qytetaret e kanë të qartë, se kur bëhet fjalë për sheshin që po quhet mega-projekt, ai po bëhet pa u bërë pranimi teknik, kur ai është ndërtuar për herën e parë dhe duhet bërë të ditur publikisht se ai shesh është bërë keq dhe tani po shpresojmë se do të bëhet mirë edhe pse pak ka shpresë dhe dihet se janë investuar miliona euro të taksave të qytetarëve. Ai kërkoi nga kryetari i komunës një sqarim profesional e përmbajtjesor lidhur me këtë çështje.

Benjamin Shala, drejtor i DSHP-së-paraqiti sqarime lidhur me çështjen e kanalizimit në fshatin Akrahticë, ku ceku se pasi është kontraktuar këto punë, do të kemi projekte të bëra për së mbari dhe ato do rezistojnë në kohë.

Sylejman Mehulli, anëtar i kuvendit-lidhur me rendin e ditës sqaroi para kuvendit se ka përcjellë një email te kryesuesja dhe MAPL-ja, ku ka shprehur qëndrimin e tij mospajtues për shkak se rendi i ditës ka bartur element të paligjshëm që i ka bërë kryesuesja e kuvendit dhe për më tepër është bërë praktikë e minimizimit të rolit të Komitetit për Politikë dhe Financa, rol të cilin ia ka dhënë ligji, po ashtu po tentohet të devalvohet puna dhe roli i kuvendit të komunës. Koj dëshmohet më së miri se në komitet, shqyrtohen 5 apo 6 pika, ndërsa në të njëjtën ditë na vjen rendi i ditës për kuvend me 14 pika të rendit të ditës, andaj kjo është e papranueshme. Në këtë kontekst shtoi dhe deklaroi duke kërkuar mirëkuptimin e të gjithëve, që të ndërpritet kjo praktikë e paligjshme dhe të gjitha pikat që nuk kanë kaluar nëpër Komitetin për Politikë dhe Financa të hiqen nga rendi i ditës. Në fund tha se kjo praktikë po ekspozon kuvendin në situata që të merren vendime të kundërligjshme sidomos për ato çështje që lidhen me pronën komunale dhe kështu po tentohet të realizohen pazare të ndryshme mes partisë që është në pushtet dhe partive tjera që i për bashkojnë këto pazare.

Bekim Zabergja, anëtar i kuvendit-deklaroi se parafolësi i tij e ka plotësisht gabim kur deklaroi se në kuvend mund të shqyrtohen vetëm pikat të cilat kalojnë në Komitetin për Politikë dhe Financa, sepse ligji ia njeht secilit anëtar të kuvendit që të bëjë propozim për futje në rendin e ditës dhe aprovim. Për më tepër, neni 36 i rregullores së kuvendit është decidiv ku njihet e drejta e secilit anëtar të kuvendit që të propozoi pika shtesë dhe të bëjë propozime tjera për ndryshimin dhe plotësimin e rendit të ditës. Ndërsa edhe për pikat tjera ligji i ka dhënë të drejtë kryetarit të komunës që të bëjë propozime për pikat tjera që janë në interes të përgjithshëm.

Sylejman Mehulli, anëtar i kuvendit-duke ju përgjigjur anëtarit të kuvendit Bekim Zabergja, ceku se ai duhet ta kuptoj dhe dalloj anëtarin e kuvendit nga ekzekutivi, sepse ligji ia ka njohur të drejtën anëtarit të kuvendit që të bëjë pika shtesë, por jo ekzekutivit komunal dhe këtu ka një dallim substancial.

Ferit Idrizi, kryetar i komunës-deklaroi se disa nga pikat e rendit të ditës i kërkojnë 2/3 e votave të kuvendit dhe për këto pika shprehu vullnetin e tij që të ketë një konsensus, sepse është interes publik i këtyre kërkesave dhe shtoi se asgjë nuk prishë punë që pikat 4 dhe 5 të kthehen për shqyrtim në Komitetin për Politikë dhe Financa, ashtu që ta marrin vizën nga ana e komitetit dhe të ecim tutje.

Faton Hyseni, anëtar i kuvendit-vlerësoi se pika 4 dhe 5 të cilat kanë të bëjnë me ndërtimin e lapidarëve, nuk duhet të hiqen nga rendi i ditës, për faktin se të njëjta më herët kanë kaluar në Komitetin për Politikë dhe Financa, andaj kërkoj nga të gjithë anëtarët e kuvendit që edhe për hir të respekti ndaj anëtarit të kuvendit z.Ali Januzi këto propozime për lapidar të aprovohen sot. Lidhur me këto propozime ai gjithëherë do të votoj pro.

Fatmire Cecelia, anëtare e kuvendit-tha se, pikat të cilat nuk kanë kaluar në komitetin për Politikë dhe Financa nuk duhet proceduar tutje dhe të cilat nuk i kanë i përmbushur kriteret ligjore, ndërsa propozimi për ndërtimin e lapidarit duhet të procedohet sepse kjo çështje më herët ka kaluar dhe shqyrtuar në KPF.

Adnan Lahu, anëtar i kuvendit-tha se, pika lidhur me ndërtimin e lapidareve nuk duhet të hiqen nga rendi i ditës dhe kërkoj edhe nga grupi kuvendar i LVV-së që këto pika të përkrahen nga ana e tyre.

Sylejman Mehulli, anëtar i kuvendit-vlerësoi se, pikat lidhur me lapidaret kanë kaluar në KPF edhe më herët dhe të njëjtat do të përkrahen nga ana e LVV-së, por shqetësim paraqet pika e 8 e rendit të ditës sa i përket komisionit për dhënien e pronës në shfrytëzim e cila ka ardhur jashtë shqyrtimi të Komitetit për Politikë dhe Financa, ku një anëtar i cili tani ka dhënë dorëheqje, ka marr pjesë në dy komisione dhe ka marr vendime të kundërligjshme dhe ka qenë në kundërshtim me konfliktin e interesit. Lidhur me këtë çështje së pari duhet të sillen vendimet e këtij komisioni që janë marr në konflikt të interesit për t'i anuluar e më pas duhet të procedohet propozim për zëvendësimin e këtij anëtari të këtij komisioni.

Adnan Lahu, anëtar i kuvendit-tha se, anëtarët e grupit të LVV-së nuk janë duke i kuptuar çështjet, sepse grupi kuvendar i LDK-së është “pro” që çështjet që kanë të bëjnë me dhënien e pronës në shfrytëzim të hiqen nga rendi i ditës dhe këtë e potencoj nga fillimi. Ndërsa sa i përket lapidarëve janë “pro” që futen në rendin e ditës për aprovim.

Kushtrim Hyseni, anëtar i kuvendit-sqaroi se, ai ka qenë anëtar i komisionit për dhënien në shfrytëzim afatshkurtre të pronës komunale, nga i cili komision ka dhënë dorëheqje, ndërsa nuk ka qenë asnjëherë anëtar i komisionit për dhënien e pronës në shfrytëzim afatgjatë kur edhe janë bërë aktivitete për dhënien e pronës në shfrytëzim e që ai nuk ka qenë pjesë e komisionit as që ka marr ndonjë vendim. Më tej sqaroi se ka qenë anëtar i Komisionit për ankesa lidhur me pronën dhe këtë detyrë e ka ushtruar konform legjislacionit në fuqi.

Ymer Haradinaj, anëtar i kuvendit-sqaroi se, anëtari i komisionit z. Kushtrim Hysen, në takimin e dytë dhe pas dy ore debat dhe shqyrtim të pikave të rendit të ditës dhe kur ai ia kishte tërhequr vërejtjen se është në konflikt të interesit tek atëherë z. Hyseni ka bërë një shkresë të dorëhiqet nga komisioni. Ndërsa lidhur me çështjen e lapidarëve, grupi kuvendar i LVV-së i përkrah plotësisht. Tutje shtoi se kërkesat apo dokumentacioni për dy lapidarët si ai në fshatin Shalle dhe Dumnicë e Poshtome nuk janë të proceduara sipas kriterëve që do të duhej të ishin. Kërkesa e fshatit Shalle nuk është e nënshkruar nga kryetari dhe këshilli lokal i fshatit.

Kushtrim Hyseni, anëtar i kuvendit-duke iu përgjigjur parafolësit të tij sqaroi se është e vërtet që janë mbajtur dy mbledhje me datat 25 dhe 28 qershor 2024, por ai dorëheqjen e ka paraqitur më datën 19 qershor 2024. Ai z. Ymer Haradinaj nuk e njeh ligjin dhe flet me hamendësime dhe

atë çfarë dëgjon në kafehanetë e qytetit, dhe në të dy mbledhjet ai nuk ka pasur kurrfarë vërejtjesh që konstatohen në proces.

Remzi Ahmeti, drejtor për Pronës- deklaroi duke sqaruar se, anëtari i komisionit z. Kushtrim Hyseni, nuk ka bërë kurrfarë shkelje ligjore, sepse para se të filloi mbledhja e komisionit ai ka paraqitur dorëheqjen e tij dhe të gjitha proceduar janë zbatuar konform ligjit.

Ali Januzi, anëtar i kuvendit-kërkoi unitet për sa i përket caktimit të lokacioneve për këta lapidar, dhe shtoi se këto lokacione janë në fshatrat ku kanë bërë rezistencën kundër armikut dhe këta lapidarë po ndërtohen në qytet. Pastaj vlerësoi se Adem Voca vërtetë është specifik sepse është legjendë në vetvetën e tij dhe se e tërë familja e tij është flijuar për atdhe dhe komb. Ai është sakrifikuar për ne të gjithë që sot të mbajmë të lirë këtë mbledhje të kuvendit, kërkoj që të gjithë të jenë unik për votimin e këtij lapidari dhe nderimit për dëshmorët.

Refik Maloku, anëtar i kuvendit-duke iu referuar raportit të auditorit, ku është konstatuar se për pozitën e punës edukatore për parashkollor, testi me shkrim nuk ishte nënshkruar nga kandidatja fituese, gjithashtu përgjigjet e pyetjeve teorike në testim me shkrim të kandidatës ishin identike me shabllonin e përgjigjeve të testit me shkrim që kishte përgatitur komisioni për pranim dhe kjo lë të kuptoj se përgjigjet e testit me shkrim ishin kopjuar. Kjo çështje duhet me urgjencë të trajtohet nga organet e hetuesitë dhe me që është i pranishëm edhe komandanti i policës ai duhet të iniciojë ndonjë hetim, sepse kemi të bëjmë me një vepër të rënd penale. Ai pyeti kryetarin e komunës se çfarë profili të mësuesit jeni duke ndërtuar, kur pësohen persona me teste të kopjuara. Përpos që duhet të fillojnë hetimet, ai propozoi që të formohet një komision për verifikimin e konkurseve në fushën e arsimit.

Sylejman Mehulli, anëtar i kuvendit-duke iu kthyer sërish çështjes së zëvendësimit të anëtarit të komisionit për pronë, shtoi se, dorëheqja përmes adresës elektronik, mund të jetë i dyshimit, por edhe nëse nuk është kështu, pyeti se përse propozimi për ndryshim dhe plotësimin e këtij komisioni nuk erdhi në muajin qershor por pikërisht tani. Më tej vazhdoi duke pyetur se cili është fati i atyre vendimeve që ai komision ka marr, sepse kjo çështje është tentuar të mbahet jashtë publike edhe pse të gjithë qytetarët e dinjë se çfarë po ndodh me pronat te lokacioni stacioni i vjetër i autobusëve.

Ferit Idrizi, kryetar i komunës-tha se, nëse z. Ali Januzi, flet pak më gjatë atëherë duhet toleruar dhe shtoi se, asnjëherë ai nuk do ta përdorë apo keqpërdorë foltoren e kuvendit për ta goditur ndonjë njeri dhe as kundërshtarët e tij politik. Ai asnjëherë nuk deklaroi për diçka që nuk di dhe apeloj që të gjithë të kemi një minimum edukate në deklaratimet publike sepse jemi para qytetarëve. Apeloj të ruhet dhe të ndiqet fryma e unitetit dhe bashkëpunimit. Te kryesuesja e kuvendit apeloj që ta respektoj rregulloren e punës së kuvendit duke e respektuar kohën e diktimit. Lidhur me raportin e auditorit dhe të gjeturat në të, ceku se i njëjti le të dërgohet te prokurori, siç është dërguar edhe më herët që iu ka dështuar sepse asgjë nuk ka për tu fshehur se ata nuk po dinë se ku ti kapen për faktin se nuk ka asnjë shkelje. Lidhur me çështjen e testit në arsim shtroj se çështjen se cila është në përfundim sepse kandidatja i ka ditur përgjigjet dhe në këtë rast ka mundur të jet edhe znj. Fatmire Cecelia.

Adnan Lahu, anëtar i kuvendit-tha se, çështja e ngritjes së komisioneve hetimore siç është ai për shëndetësi dhe për prona është jashtë mandatit tonë dhe jemi duke rrëshqitur në marrjen e kompetencave si të ishim në rolin e prokurorit apo të gjykatësit, kompetenca që nuk na takojnë. Prandaj komisioni hetimor për arsim le të ngritet, por dijini se jeni në kundërshtim me ligjin. Me që janë formuar komisione të tilla edhe më herët le të formohet edhe ky komision dhe si grup i LDK-së e përkrahim këtë komision.

Ferit Idrizi, kryetar i komunës-tha, aspak nuk i pengon ngritja e komisionit hetimor, por nëse ka të gjetura atëherë merrni ato dhe dërgoni te organet e hetuesisë dhe prokurorisë. Nëse është

konstatuar shkelje në ato teste atëherë le të merret ajo lëndë e cila është publike dhe të dërgohet te prokuroria, por mos të tentohet në këto forma të goditen njerëzit dhe të tentohet të krijohen insinuata.

Faton Hyseni, anëtar i kuvendit-tha se, raporti i auditorit është publik dhe nëse ka shkelej atëherë duhet të iniciohet procedura hetimore. Nëse shkohet me formim të komisionit atëherë ne sikur po i marrim kompetencat e organeve të drejtësisë.

Albanez Tahiraj, drejtor i DKA-së-duke ju referuar raportit të auditorit, ku ceket se testi nuk ishte i nënshkruar nga kandidatja fituese, ceku se kjo përgjegjësi bie tërësisht mbi kandidaten që ka qenë fituese. Tutje sqaroi se me të gjeturat në raportin e auditorit kryetari i komunës ka nënshkruar një letër për pranimin e këtij raporti në mënyrë formale, por nuk ka mundur të merret në mënyrë meritore me këto çështje për shkak të problemeve shëndetësore që ka pasur në atë kohë, që është ballafaquar me dy operacione. Në këtë kontekst ai vlerësoi duke sqaruar se, vitin e kaluar kryetari i komunës e kishte sfiduar auditorin duke e ballafaquar me fakte lidhur me raportin e tij.

Në fund të debatit, jashtë rendit të ditës dhe për rendin e ditës, Kuvendi pas votimit me 25 vota “për”, të tjerat abstenim, aprovoi këtë:

R E N D I T E

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 27 qershor 2024.
2. Shqyrtimi i Informatës për gjendjen e sigurisë në Komunën e Vushtrrisë, për periudhën janar-qershor 2024.
3. Shqyrtimi dhe aprovimi i Propozim-vendimit për caktimin e lokacionit për ndërtimin e lapidarit në fshatin Dumnicë e Poshtme.
4. Shqyrtimi dhe aprovimi i Propozim-vendimit për caktimin e lokacionit për ndërtimin e lapidarit për heroin “Adem Voca” në fshatin Pasomë.
5. Shqyrtimi dhe aprovimi i Propozim-vendimit për caktimin e lokacionit për ndërtimin e pllakës përkujtimore për z. Milaim Fejzullahu, ish-komandant i Policisë së Kosovës.
6. Shqyrtimi i Informatës lidhur me zbatimin e vendimeve të Kuvendit të Komunës, për periudhën janar-qershor 2024.
7. Shqyrtimi i Informatës lidhur me mbrojtjen e mjedisit.
8. Shqyrtimi dhe aprovimi i Propozim-vendimit për ndryshimin dhe plotësimin e vendimit me numër të protokollit Nr.01-63/24 i datës 28.03.2024, për formimin e komisionit për zbatimin e procedurave të dhënies në shfrytëzim afatshkurtër të pronës së paluajtshme komunale.
9. Shqyrtimi dhe aprovimi i Draft-Rregullores për ndryshimin dhe plotësimin e Rregullores (KKV) Nr.02/2023 për Tarifa, Ngarkesa dhe Gjoha Komunale.
10. Shqyrtimi dhe aprovimi i Raporti për të hyrat dhe shpenzimet buxhetore të komunës për periudhën janar-qershor 2024.
11. Shqyrtimi dhe aprovimi i Raportit Vjetor Financiar dhe Raporti i Auditimit për Pasqyrat Financiare Vjetore.
12. Shqyrtimi i Raportit të Komisionit Komunal të Aksionarëve i N.P.L. “Përparimi” SH.A për vitin 2023.
13. Shqyrtimi i kërkesës për ofrimin e mbështetjes financiare për Klubin e Hendbollit “Samadrexha” F.
14. Pyetje dhe përgjigje.

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë mbajtur më datë 27 qershor 2024.

Pas shqyrtimit të kësaj pike të rendit të ditës, Kuvendi me 27 vota “për”, aprovoi procesverbalin nga mbledhja rregullt e Kuvendit të Komunës së Vushtrrisë, mbajtur më mbajtur më datë 27 qershor 2024.

2. Shqyrtimi i Informatës për gjendjen e sigurisë në Komunën e Vushtrrisë, për periudhën janar-qershor 2024.

Reshat Kovaçi, komandant i Stacionit Policor në Vushtri-në adresimin e tij para kuvendit, në lidhje me deklaratimet e anëtarit të kuvendit z. Refik Maloku, ceku se të gjithë ata që kanë informata se ndokush ka konsumuar elemente të veprës penale duhet të prezantojnë në stacionin policor, ndërsa lidhur me deklaratimet e anëtarit të kuvendit, njoftoj se profesor Refik Maloku, do të kontaktohet nga zyrtarët policor për ti marr informatat e tij për pretendimet e tij për kryerjen e ndonjë vepre penale nga ana e ndonjë zyrtari komunal.

Sylejman Mehulli, anëtar i kuvendit-pasi e falënderoi togerin z. Kovaçi dhe policinë në përgjithësi për bashkëpunimi dhe ofrimin e sigurisë për të gjithë qytetarët, ceku se, i vjen shumë keq që togeri rastisë të prezantoi në një seancë të kuvendit ku abuzohet fjala e lirë dhe demokracia. Tutje vlerësoi se siguria e demokracisë në këtë kuvend është e rrezikuar kaherë, për faktin se kryesuesja e kuvendit sigurisht e dirigjuar, kokë në veti e në kundërshtim me Ligjin për Vetëqeverisjes Lokale, me statutin e komunës dhe rregulloren e punës së kuvendit, nuk e qet në votim propozimin për futje në rendin e ditës, themelimin e komisionit për verifikimin e të gjeturave të auditorit të përgjithshëm krejt kjo qëllimshëm dhe po ashtu nuk e hedh në votim propozimin e tij për largimin nga rendi i ditës të pikës që ka të bëjë me plotësim-ndryshimin e komisionit për dhënin në shfrytëzim të pronave. Nëse MAPL i shikojnë dhe dëgjojnë këto incizime të kësaj seance të kuvendit, duhet ti nderojnë alarmet për mënyrën e udhëheqjes së kuvendit, sepse këta na flasin për madhështinë e memorialëve, ndërsa i mbushin kutitë e votimet me vota për peronat që nuk janë në sallën e mbledhje janë pikërisht këta të njëjtët, që i nderojnë dëshmoret duke u rrëfyer para prokurorisë për votimet për persona jo prezent, dhe sigurisht se edhe ky rast është për tu trajtuar nga ana e policisë. Në krejt këtë histori kanë qenë të përfshirë kryesuesja e kuvendit, nënkryetari i komunës dhe anëtarët e kuvendit nga partia në pushtet, kokë e kryer kanë qenë të implikuar dhe këtë nuk do ta harrojmë asnjë herë deri në një epilog gjyqësor. Si grup kuvendar shprehim mos pajtimin e plotë me mënyrën e udhëheqjes së kuvendit, sepse nuk është duke u udhëhequr në mënyrë demokratike dhe nuk ka të bëjë me mbarëvajtje të mbarë të punës së kuvendit. Anëtarët e kuvendit vinë në seancë të kuvendit, sepse këtë mision e kanë marr nga ana e qytetarëve dhe nuk janë këtu as për interesa të kryetarit të komunës, as për kryesuesen e kuvendit dhe për asnjë individ tjetër sepse kuvend i takon anëtarëve të tij.

3. Shqyrtimi dhe aprovimi i Propozim-vendimit për caktimin e lokacionit për ndërtimin e lapidarit në fshatin Dumnicë e Poshtme.

Në vazhdim, pas propozimeve të bëra kuvendi me vota unanime themeloj Komisionin Kuvendar për mbarëvajtjen e procesit të votimit lidhur me pikata 3, 4 dhe 5 në përbërjen si në vijim:

1. **Jeton Gjaka, anëtar i kuvendit PDK;**
2. **Bujar Pllana, anëtar i kuvendit LDK;**
3. **Ymer Haradinaj, anëtar i kuvendit LVV.**

Pas verifikimit dhe konstatimit nga ana e komisionit se fletëvotimet janë në rregull, filloj procesi i votimit të fshehët për pikën 3 të rendit të ditës Propozim-vendimi për caktimin e lokacionit për ndërtimin e lapidarit në fshatin Dumnicë e Poshtme.

Pas përfundimit të votimit dhe numrit të votave nga ana e komisionit, kryesuesja e kuvendit konstatoj se me 27 vota “për” 1 votë “kundër” dhe 2 vota “abstenim” kuvendit vendosi me sa vijon:

1. Me këtë vendim caktohet lokacioni për ndërtim të lapidarit për të rënë për Liri nga fshati Dumnicë e Poshtme, Komuna e Vushtrrisë, kundër pushtuesit serb, para, gjatë dhe pas luftës së dytë botërore.
2. Ndërtimi i lapidarit do të bëhet në parcelën kadastrale P-70202026-00704-0, në sipërfaqe prej 450 m², vendi i quajtur “Shpoti”, dhe në pjesë të parcelës kadastrale P-70202026-00703-0 në sipërfaqe prej 1500 m² nga sipërfaqja e përgjithshme prej 3283 m², vendi i quajtur “Shpati Gazhjan”, Zona Kadastrale Dumnicë e Poshtme, pronë e Komunës së Vushtrrisë.
3. Për zbatimin e këtij vendimi obligohen: Drejtoria për Kulturë Rini dhe Sport, Drejtoria për Gjeodezi Kadastër dhe Pronë që do të bëjnë shenjëzimin e sipërfaqes në parcelën nga pika 1 e këtij vendimi si dhe regjistrimin në RDPP dhe dokumentet tjera të parapara me legjislacionin në fuqi.
4. Financimi i realizimit të këtij projekti do të bëhet nga komuniteti i fshatit Dumnicë e Poshtme. Këshilli i këtij fshati do të siguroj listën e emrave të cilët do të shkruhen në lapidar.
5. Pjesë përbërëse e këtij vendimi janë: Kërkesa e përfaqësuesve të fshatit Dumnicë e Poshtme, Lista me nënshkrime, Lista e emrave të cilët do të shkruhen në lapidar dhe certifikata mbi të drejtën e pronës dhe kopja e planit.
6. Ky Vendim hynë në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.
4. Shqyrtimi dhe aprovimi i Propozim-vendimit për caktimin e lokacionit për ndërtimin e lapidarit për heroin “Adem Voca” në fshatin Pasomë.

Pas verifikimit dhe konstatimit nga ana e komisionit se fletëvotimet janë në rregull, filloj procesi i votimit të fshehët për pikën 4 të rendit të ditës Propozim-vendimi caktimin e lokacionit për ndërtimin e lapidarit për heroin “Adem Voca” në fshatin Pasomë.

Pas përfundimit të votimit dhe numrit të votave nga ana e komisionit, kryesuesja e kuvendit konstatoj se me 24 vota “për”, 5 vota “kundër” dhe 1 votë “abstenim”, kuvendi vendosi me sa vijon:

1. Me këtë vendim caktohet lokacioni për ndërtimin e lapidarit në fshatin Pasomë, pjesë nga parcela kadastrale P-70202050-01296-0 në sipërfaqe prej 613 m², nga sipërfaqja e përgjithshme prej 89886 m², me kulturë kullosë e kl.4 ZK - Pasomë, e cila evidentohet si pronë e Komunës së Vushtrrisë.

2. Me këtë vendim lejohet ndërrimi i destinimit të patundshmërisë të cekur në nenin 1 të këtij vendimi, kurse me hyrjen në fuqi të këtij vendimi, obligohet Drejtoria për Kadastër, Gjeodezi dhe Pronë që të bëjë ndërrimin e destinimit (kulturës) së kësaj parcele në elaboratin kadastral.

3. Për zbatimin e këtij vendimi obligohen: Drejtoria për Kulturë, Rini dhe Sport, Drejtoria për Gjeodezi, Kadastër, dhe Pronë, si dhe Drejtoria për Urbanizëm dhe Mbrojtje të Ambientit.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

5. Shqyrtimi dhe aprovimi i Propozim-vendimit për caktimin e lokacionit për ndërtimin e pllakës përkujtimore për z. Milaim Fejzullahu, ish-komandant i Policisë së Kosovës.

Pas verifikimit dhe konstatimit nga ana e komisionit se fletëvotimet janë në rregull, filloj procesi i votimit të fshehët për pikën 5 të rendit të ditës Propozim-vendimi për caktimin e lokacionit për ndërtimin e pllakës përkujtimore për z. Milaim Fejzullahu, ish-komandant i Policisë së Kosovës.

Pas përfundimit të votimit dhe numrit të votave nga ana e komisionit, kryesuesja e kuvendit konstatoj se me 28 vota “për”, 1 votë “kundër” dhe 1 votë “abstenim”, kuvendit vendosi me sa vijon:

1. Me këtë vendim caktohet lokacioni për ndërtimin e pllakës përkujtimore për ish-komandantin e UÇK-së dhe Komandantin e Policisë së Kosovës z.Milaim Fejzullahu në fshatin Shalë/Shallc, në parcelën kadastrale P-70202069-00341-0 në sipërfaqe prej 959 m², me kulturë kullosë e kl.4 ZK - Shalë/Shallc, e cila evidentohet si pronë e Komunës së Vushtrrisë.

2. Aprovohet peticioni i banorëve të fshatit Shalë/Shallc, me Nr.02-104/02-17682/24 i datës 22.04.2024 i parashtruar në emër të z.Sabri Fejzullahu, me të cilin është kërkuar rregullimi i një paraku në fshatin Shallc dhe vënia e pllakës përkujtimore për ish-komandantin e UÇK-së dhe Komandantin e Policës së Kosovës z.Milaim Fejzullahu.

3. Për zbatimin e këtij vendimi obligohen: Drejtoria për Kulturë Rini dhe Sport, Drejtoria për Gjeodezi Kadastër dhe Pronë, që do të bëjnë shenjëzimin e sipërfaqes në parcelën nga pika 1 e këtij vendimi si dhe regjistrimin në RDPP dhe dokumentet tjera të parapara me legjislacionin në fuqi.

4. Pjesë përbërëse e këtij vendimi janë: Kërkesa e përfaqësuesve të fshatit Shallc, certifikata mbi të drejtën e pronës dhe kopja e planit.

5. Ky Vendim hynë në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

6. Shqyrtimi i Informatës lidhur me zbatimin e vendimeve të Kuvendit të Komunës, për periudhën janar-qershor 2024.

Sylejman Meholli, anëtar i kuvendit-vlerësoi se vendimet e kuvendit janë obliguese për zbatim nga kryetari i komunës dhe ekzekutivi komunale, për deri sa ato janë në fuqi dhe kuvendi nuk vepron ndryshe me një vendim tjetër për shfuqizim apo për anulim. Më tej ngri shqetësimin për mos zbatimin e një vendimi për sa i përket emërimit të Teatrit të Qytetit me emrin e Artistit <Adem Mikullofi>, si grup i LVV-së me financa vetanake e kanë vendosur një pllakë më emrin e teatrit të qytetit në ballë të këtij institucioni, dhe sipas informatave jo zyrtare ajo pllakë është larguar nga era dhe tashmë edhe kjo përgjigje jo zyrtare nuk i plotëson kushtet për të qenë e vërtetë, kjo për faktin se qeveris Idrizi, nuk i kanë mjaftuar 3 vite qeverisje për të vendosur këtë pllakë sipas vendimit të kuvendit, dhe krejt kjo po ndodh për shkak të inateve politike dhe kjo është e turpshme, se si po provohet të përdhohet emri i një figure të madhe të Kombit tonë vetëm e vetëm pse i ka takuar një subjekti të caktuar politikë.

7. Shqyrtimi i Informatës lidhur me mbrojtjen e mjedisit.

Ymer Haradinaj, anëtar i kuvendit-ngriti shqetësimin e tij dhe të qytetarëve për kanalizimin në fshatin Stanoc i Epërm që vjen nga fshati Breznicë në drejtim të lumit “Llap” e që ai kanalizim ka defekt dhe si pasojë e kësaj po kundërmon me një erë jashtëzakonisht të rëndë dhe po kanos me shkaktimin e ndonjë epidemie për banorët lokal. Defekti më i madh i këtij kanalizimi është tek lagjet Bllacaj, Maloku dhe Haradinaj aty ne lagjet që gravitojnë shumë banorë. Kërkoj nga kryetari i komunës dhe drejtoria kompetente që të ndërmarrin veprimet e menjëhershme, duke lidhur një memorandum bashkëpunimi me Komunën e Obiliqit sepse ky kanalizim vjen nga fshati Breznicë që është në Komunën e Obiliqit, dhe të dyja këto komuna janë të obliguara që të bëjnë rregullimin dhe sanimin e këtij problemi. Po ashtu, përsërit kërkesën e tij për nevojën urgjente për eliminimin e një deponie të mbeturinave në fshatin Stanoc i Epërm, sepse e njëjta po shkakton pengesa për fermerët për t’i punuar tokat e tyre. Kërkoj që urgjentisht të merren masat adekuate nga organet kompetente, për eliminimin e kësaj deponie.

Ali Januzi, anëtar i kuvendit-ngrit dhe përsërit shqetësimin e tij të kamotshëm për një deponi ilegale në fshatin Pasomë dhe për dëmtimin e rrugës në këtë fshatë nga një operator ekonomike, kërkoj të merren masa të menjëhershme duke ndaluar së gjuajturi mbeturina në atë zonë, sepse jetesa e atyre banorëve lokal është bërë e padurueshme. Më tej ngrit çështje e tharjes së drunjtëve dekorativ dhe luleve që po mbjellën në qytet si rezultat i thatësirave fatale, mos kujdesit dhe mos ujitjes nga ana e autoriteteve komunale.

8. Shqyrtimi dhe aprovimi i Propozim-vendimit për ndryshimin dhe plotësimin e vendimit me numër të protokollit Nr.01-63/24 i datës 28.03.2024 për formimin e komisionit për zbatimin e procedurave të dhënies në shfrytëzim afatshkurtër të pronës së paluajtshme komunale.

Ymer Haradinaj, anëtar i kuvendit-tha se z.Kushtrim Hyseni është zgjedhur anëtar i komisionit për dhënien në shfrytëzim afatshkurtër të pronës komunale në mbledhjen e kuvendit të muajit mars 2024. Ligji për dhënien në shfrytëzim të pronës komunale konkretisht neni 18 përcakton: Kuvendi i Komunës formon Komisionin e Ankesave i cili do të shqyrtojë ankesat e palëve në procedurën e dhënies në shfrytëzim afatshkurtër dhe afatgjatë të pronës së paluajtshme të komunës, në përbërje prej pesë (5) anëtarëve. Andaj z.Kushtrim Hyseni, ka qenë anëtar edhe i komisionit për shqyrtimin

e ankesave lidhur me pronën komunale dhe kësisoj ai ka vepruar në konflikt të interesit duke qenë pjesë e dy komisioneve. Në këtë kontekst pyeti anëtarin e komisionit t cekur më lartë sa ka mbajtur ndonjë mbledhje dhe a ka marr ndonjë vendim Komisioni për dhënien në shfrytëzim afatshkurtër të pronës komunale, duke ditur se ai ka qenë në konflikt të interesit. Ai kërkoi që kjo pikë e rendit të ditës të shtyhet për mbledhjen e ardhshme derisa ti kemi informata e duhura dhe kjo çështje të sqarohet përfundimisht se anëtari i apostrofuari ka vepruar në konflikt të interesit duke qenë pjesë e dy komisioneve.

Bekim Zabergja, anëtar i komisionit-tha se kuvendi ka vepruar gabimisht kur ka votuar që z. Kushtrim Hyseni të jetë pjesë e dy komisioneve, dhe shtoj se nuk ka kurrfarë pengesa tashmë sepse i apostrofuari para mbajtjes së takimeve ka dhënë dorëheqje nga Komisioni për dhënien në shfrytëzim afatshkurtër të pronës komunale. Andaj propozoi që të procedohet tutje me votim për ndryshimin dhe plotësimin e komisionit në fjalë.

Sylejman Mehulli, anëtar i kuvendit-tha se pas sqarimeve që i morëm, nuk vend për diskutim sepse sheshazi po del se njëri nga anëtarë e atij komisioni z.Kushtrim Hyseni ka qenë në konflikt të interesit, prandaj bazuar në këto informata kërkoj që të sillen të gjitha dokumentet dhe vendimet që janë marr nga ai komision që ka vepruar në konflikt të interesit. Duke marr për bazë se komisionit ka qenë në përbërje jo të plotë edhe vendimet nuk mund të jenë të vlefshme, andaj kësisoj ata si grup kuvendar nuk e mbështesin këtë pikë të rendit të ditës.

Agron Përçuku, anëtar i kuvendit-tha se defekti i këtij kuvendi është se ka formuar disa komisione dhe ato akoma nuk kanë ndërmarr asnjë përgjegjësi. Në mbledhjen kur është votuar ky komision atë ditë ka pasur shkelej, sepse atë ditë nuk është dashur të aprovohet vendimi për formimin e komisionit për ankesa lidhur me pronën, sepse ky vendim ka qenë i paligjshëm përderisa anëtari i kuvendit ka qenë pjesë e një komisioni tjetër që lidhet me dhënien e pronës në shfrytëzim. Më tej shtoj se askujt nuk i lejohet të zgjedhë se në cilin komision dëshiron të qëndroj, krejt kjo për interesa të individëve të caktuar. Pastaj ai vlerësoi dhe konstatoi se vendimi i parë ku është zgjedhur z.Hyseni anëtar është i ligjshëm sepse ka marr aprovimin e MAPL-së, ndërsa vendimi i dytë për shqyrtimin e ankesave është i paligjshëm dhe si i tillë duhet të anulohet.

Kushtim Hyseni, anëtar i kuvendit-sqaroi se ka qenë anëtarë i komisionit për dhënien e pronës në shfrytëzim afatshkurtër, komision ky i cili akoma nuk ka zhvilluar asnjë aktivitet, nuk ka mbajtur ndonjë mbledhje, dhe as që bëhet fjalë për shpalljen e ndonjë procedure për dhënin e pronës në shfrytëzim dhe marrjen e ndonjë vendimi. Më tej shtoj se nga ky komision ka dhënë dorëheqje me datën 19 qershor 2024, ndërsa mbledhjet e komisionit për shqyrtimin e ankesave lidhur me dhënien e pronës në shfrytëzim janë mbajtur më 25 përkatësisht 28 qershor 2024 që i bie se dorëheqje ka dhënë 6 përkatësisht 9 ditë para mbajtjes së mbledhjeve të komisionit për shqyrtimin e ankesave lidhur me dhënien e pronës në shfrytëzim, në këtë kuptim nuk bëhet fjalë për kurrfarë konflikti të interesit.

Sylejman Mehulli, anëtar i kuvendit-tha se atë që e deklaroi në fillim në mbledhje po vërtetohet se ky rend dite është dizajnuar asi soj që po ndodh ajo se çfarë po ndodh aktualisht, ku renditja e pikave të rendit të ditës, që ndryshojnë nga mbledhja e Komitetit për Politikë dhe Financa, ashtu që pikat e rëndësishme siç janë raporti i auditorit, ai i shpenzimeve buxhetore dhe raporti i Ndërmarrjes “Përparimi” janë zhvendosur më poshtë për ta larguar vëmendjen e anëtarëve të kuvendit. Prandaj duke pasur parasysh këto rrethana kërkoj që kjo mbledhje të ndërpritet dhe të vazhdohet për një ditë tjetër kur prezent do të jetë edhe kryetari i komunës për raportuar para kuvendit. Lidhur me pikën 8 propozimi për plotësimin e komisionit për ankesa lidhur me pronën komunale, vlerësoi se konflikti i interesit ka ndodhur në vendimin dhe komisionin e dytë atë për shqyrtimin e ankesave lidhur me pronën komunale, dhe personi i cili po deklarohet se ka dhënë

dorëheqje nuk mundet të zgjedhe se në cilin komision dëshiron të qëndroj dhe në cilin do jap dorëheqje, sepse ai dorëheqjen duhet ta bëj nga komisioni i cili është i paligjshëm dhe aty ku ka rënë në konflikt të interesit. Dhe z. Hyseni është ndeshur në konflikt të interesit atëherë kur është bërë pjesë e komisionit për shqyrtimin e ankesave lidhur me pronën komunale.

Mentor Ferizi, anëtar i kuvendit-tha se sikur disa anëtarë të kuvendit nuk janë duke e kuptuar se çfarë është konflikti i interesit, sepse konflikti i interesit nënkupton kur ndokush ankohet se peroni i caktuar ka pasur interesa të caktuara në një vendimarrje. Në rastin konkret konsideron se nuk ka kurrfarë konflikti të interesit.

Në fund të debatit lidhur me këtë pikë të rendit të ditës, kuvendi pas votimit me 16 vota “për” të tjerët nuk morën pjesë në votim, në këtë rast kryesuesja e kuvendit konstatoj se: Propozim-vendimi për ndryshimin dhe plotësimin e vendimit me numër të protokollit Nr.01-63/24 i datës 28.03.2024 për formimin e komisionit për zbatimin e procedurave të dhënies në shfrytëzim afatshkurtër të pronës së paluajtshme komunale, nuk aprovohet.

9. Shqyrtimi dhe aprovimi i Draft-Rregullores për ndryshimin dhe plotësimin e Rregullores (KKV) Nr.02/2023 për Tarifa, Ngarkesa dhe Gjoha Komunale.

Ilijana Azemi, zyrtare në DUMM-paraqiti sqarime hyrës lidhur me draft-rregulloren në fjalë duke shuar se plotësim-ndryshimi i kësaj rregulloreje ka ardhur si rezultat i kërkesave të drejtorive komunale dhe sipas nevojave të kohës.

Fatmire Cecelia, anëtare e kuvendit-tha se kjo rregullore është aprovuar në muajin dhjetor 2023, dhe kjo tregon më së mirë se nuk kemi hartuar një rregullore të mirëfilltë sepse pas 6 muajsh ajo është sjellë serish për ndryshim dhe plotësim. Më tej shtoj se është mirë që janë ndryshuar dhe lehtësuar tarifat sa i përket sportit dhe kulturës. Mandej pyet se sa është duke u zbatuar rregullorja aktuale për taksat për dhënie e pronës në shfrytëzim, kur dihet fakti se në bazë të një raporti del se ka qindra mira euro borxhe ndaj komunës si nga bizneset ashtu edhe nga qiramarrësit tjerë për shfrytëzimin e pronës komunale.

Sylejman Mehulli, anëtar i kuvendit-tha se kur bëhen plotësim-ndryshimet e rregulloreve komunale është obligim ligjor që të zhvillohen debatet publike, nga grupe interesi dhe qytetar të cilët preken në sferën e interesit nga ai akt apo ajo rregullore. Mirëpo në rastin konkret për këtë rregullore nuk ka pasur një target-grup i cili do të ishte adekuat me këtë rregullore. Në listën e pjesëmarrësve për dëgjimin publik për këtë rregullore shihet se janë pastruesit e komunës dhe punëtorët e administratës komunale. Prandaj në vend se për këtë rregullore të ftohen sportistët, bizneset dhe grup tjera që do të mund të jepnin mendimin e tyre të vlefshëm, hartuesi i kësaj rregulloreje inskenon situata gjoja se dikush ka marr pjesë në takim, ndërsa realiteti është krejt tjetër fare.

Ilijana Azemi, zyrtare në DUMM-sqaroi duke u përgjigjur se për tarifat lidhur me pronën komunale, zbatohet një ligj tjetër Ligji për Dhënie në Shfrytëzim si dhe rregullorja përkatës, rregullorja për taksat dhe tarifa nuk bie në këtë domen të aplikimit të taksave. Po ashtu njoftoi se në rregullore duhet të futet edhe taksat për certifikatën për zotësinë e veprimit për funksionarët e ndryshëm publik, taksë në vlerë prej 10 €.

Në fund të debatit lidhur me këtë pikë të rendit të ditës, kuvendi pas votimit me 18 vota “për”, të tjerët nuk morën pjesë në votim, aprovoi Rregulloren për ndryshimin dhe plotësimin e Rregullores (KKV) Nr.02/2023 për Tarifa, Ngarkesa dhe Gjoha Komunale.

10. Shqyrtimi dhe aprovimi i Raporti për të hyrat dhe shpenzimet buxhetore të komunës për periudhën janar-qershor 2024.

Adnan Lahu, anëtar i kuvendit-tha se ky raport është hartuar në mënyrë tepër jo profesionale, dhe shtoj se cilësia e një raporti matet me aplikimin e metodave krahasimore. Në rastin konkret nuk kemi një krahasim me vitin e kaluar sa i përket kategorive investime kapitale, subvencione, mallra dhe shërbime dhe për kategoritë tjera ekonomike. Në këtë kontekst shprehu dyshimin se kjo është bërë me qëllim për faktin se të hyrat për këtë periudhë janë më të ulëta, ndërsa shpenzimet janë rritur krahasuar me periudhën e njëjtë të vitit të kaluar. Në fund tha se grupi kuvendar i LDK-së një raport të tillë nuk mund ta përkrahë.

Sylejman Mehulli, anëtar i kuvendit-tha se ky raport pasqyron një performancë tejet të dobët të qeverisjes komunale të cilën e kemi pasur në vazhdimësi në kuptimin e shpenzimit të buxhetit, sidomos tek investimet kapitale. Ai deklaroi se ky raport nuk mund të merret seriozisht si i tillë është një përpjekje për ti vu në lajthitje anëtarët e kuvendit, andaj me keqardhje nuk meriton të merremi fare me të.

Fatmire Cecelia, anëtare e kuvendit-tha se në bazë të raportit del se shpenzimet e pastrimit janë rritur nga 7500 € sa kanë qenë vitin e kaluar, këtë vit 19,500 €, dhe kjo dihet sepse cili operator ekonomik e ka marr tenderin për pastrim. Pastaj pyeti se ku kanë shkuar rreth 254,000.00€ për mirëmbajtjen e rrugëve kur dihet se rrugët e qytetit janë gjendje të katrahurës. Pastaj kemi rritje të shpenzimeve për sa i takon drekave zyrtare ku në vitin e kaluar ishin 16,000.00 € shpenzime për këtë destinim ndërsa këtë vit rritja ka shkuar në 23,000.00 €. Më tej njoftoj qytetarët se Komuna e Vushtrrisë për vitin 2024 ka paraparë të realizoj 238 projekte kapitale, ndërsa 180 prej tyre fare nuk kanë filluar ndërsa jeni në muajin e tetë të vitit 2024. Në fund ceku se kur të shikohet përqindja e shpenzimit të buxhetit del e lartë për shkak të përmbarimit ndërsa mungojnë projektet që do të duhej të financoheshin nga taksat e qytetarëve.

Isuf Jashari, drejtor i DBF-së-paraqiti sqarime lidhur me raportin për të hyrat dhe shpenzimet buxhetore të komunës për periudhën janar-qershor 2024, duke u përgjigjur në pyetjet e anëtarëve të kuvendit. Ai sqaroi se për këtë periudhë shkalla e shpenzimit dhe realizimit të buxhetit është e kënaqshme në masën rreth 90%, dhe atë në gjitha kategoritë ekonomike.

Nasuf Aliu, anëtar i kuvendit-vlerësoi se drejtori i Drejtorisë për Buxhet dhe Financa, me mjeshtri ka paraqitur në tabela shpenzimin e buxhetit. Ne e dimë se buxheti i komunës aprovohet për një vit kalendarik, ndërsa në bazë të dhënave që i parashtrij drejtori shpenzimi i buxhetit i ofrohet masës 100%, por realiteti i shpenzimit të buxhetit është rreth 33 %. Ajo çfarë është shqetësuese është fakti se janë rreth 184 projekte me shumën zero, që nuk kanë filluar fare, ndërsa janë 37 projekte me shuma simbolike si p.sh. ndërtimi i Sheshit “Hasan Prishtina” vlera 37 €. Dhe për këtë ceku se çfarë gabimesh kanë mundur të rrjedhin.

Ymer Haradinaj, anëtar i kuvendit-tha se është bërë rutinë që të kemi përsëritje të gabimeve teknike, dhe edhe ky raport i referohet vitit 2023, ndërsa raporti është për periudhën janar-qershor 2024. Kjo gabime tregojnë se jeni duke punuar nënë presion të lartë se po keni edhe punë tjera për bërë përpos punës që paguheni nga taksat e qytetarëve. Tutje shtoj se raporti konstaton se janë shpenzuar goxha do mjete financiare por janë kryer pak projekte, projektet nuk janë kryer sepse mjetet i kanë marr përmbaruesit privat. Duke ju referuar diskutimit të kryetarit të komunës, për

dëmet nga Kontrata Kolektive që i ka shkaktuar Ministria e Arsimit, ceku se kjo kontratë është nënshkruar në vitin 2017 pak para fillimit të fushatës elektorale, dhe nuk ka të bëjë fare me ministrinë aktuale. Më tej duke u bazuar në raport ceku disa projekte që kanë shuma tejet simbolike si p.sh. Riparimi i Shkollës Krasniqe e Poshtme shuma e projektit 1 €, fondi me bashkëfinancim me kubëz vlera 2 €, rregullimi i trotuareve Vushtrri-Stanoc Smrekonicë 0.25 €, rikonstruktimi i rrugëve të asfaltuara në Vushtrri 0.99 €, ngritja e serave 2 €, ndërtimi i parkuar në Stanoc 0.53 €, rregullimi i nyjeve sanitare në Vushtrri 63 €, rregullimi i Palestrës Sportive “Jeton Tërstena” 0.75€. **Isuf Jashari, drejtor i DBF-së-sqaroi** se shumatat dhe vlerat simbolike, në projektet kapitale, kanë mbetur si rezultat që janë marr mjetet financiare për shkak të inflacionit të pagave, dhe mjetet nga departamenti i thesarit janë marr tani ato shuma kanë mbetur kur është bërë ridestinimi i mjeteve.

Në fund të debatit lidhur me këtë pikë të rendit të ditës, kuvendi pas votimit me 12 vota “për”, 13 vota “kundër” dhe 1 votë “abstenim”, nuk e aprovoj raportin për të hyrat dhe shpenzimet buxhetore të komunës, për periudhën janar-qershor 2024.

11. Shqyrtimi dhe aprovimi i Raportit Vjetor Financiar dhe Raporti i Auditimit për Pasqyrat Financiare Vjetore.

Adnan Lahu, anëtar i kuvendit-tha se për tu fshehur të gjeturat në raportin e auditorit të përgjithshëm ai është futur bashkërisht me raportin e përgjithshëm financiar. Tutje shtoj dhe vlerësoi se raporti i auditorit është një ndër pikat më rëndësishme për komunën dhe mos të jetë kryetari i komunës prezent kjo është jo serioze, kjo për faktin se para disa mbledhjeve kryesuesja e kuvendit e kishte shtyrë mbledhjen pikërisht për shkak të mungesës së kryetarit në mbledhjen e kuvendit. Kryetari i komunës ka zgjedhur që të ikë nga debati, dhe për mos tu ballafaquar me të gjeturat e auditorit të përgjithshëm, mirëpo kjo nuk ka rëndësi sepse qytetarët janë duke e ditur se çfarë po ndodhë me qeverisjen aktuale të komunës. Qytetarë duhet ta dinë se nga 18 të gjetura apo rekomandime, që kanë qenë nga viti i kaluar tani janë shtuar edhe 9 tjera, d.m.th. si komunë kemi dështuar në adresimin e rekomandimeve dhe për më keq është shtuar numri i rekomandimeve nga ana e auditorit të përgjithshëm. Për secilën prej këtyre të gjeturave janë duke u marr organet e rendit, ndërsa për secilën prej tyre do të debatohet atëherë kur do të jetë i pranishëm kryetari i komunës.

Sylejman Mehulli, anëtar i kuvendit-tha se raporti i auditorit do të duhej të ishte ndër pikat më të rëndësishmet në këtë, kuvend por siç po shihet nuk ka gatishmëri për debat sepse ka shmangie dhe ikeje nga debati. Tutje vlerësoi se shpreson se kryetari bashkë me ata drejtor që janë fascinuar se si kryetari iu ka përgjigjur auditorëve po në fund janë pajtuar më të gjeturat kanë për të shkuar në një vend tjetër për tu rrëfyer sepse raporti është i kualifikuar, dhe për më tepër ai listoj disa nga të gjeturat e auditorit të përgjithshëm për Komunën e Vushtrrisë. Zyra Kombëtare e Auditimit në Komunën e Vushtrrisë ka identifikuar se: në fushën e arsimit për pozitën e punës edukatore parashkollore testi me shkrim nuk ishte nënshkruar nga kandidatja fituese gjithashtu përgjigjet në testin me shkrim ishin identike me shabllon e testi me shkrim që kishte përgatitur komisioni për pranim dhe kjo lenë të kuptoj se përgjigjet me shkrim të jenë të kopjuara. Për pozitën në lëndën e tekstilit në konkurs ishte kërkuar që kandidati/ja të kishte përgatitje shkollore inxhinier i tekstilit drejtimi konfeksion, ndërsa kandidatja e pranuar kishte përgatitje shkollore bachelor i dizajnit dhe modës, për këtë pyeti kryetarin e komunës se a bëhet fjalë për një mësimdhënëse me të cilën shëtiste rrugëve të Tiransë duke ia mbuluar edhe shpenzimet, fotografit e tyre dukshin bukur, por shkeljet janë flagrante. Në fushën e shëndetësisë auditori ka gjetur se njëra nga organizata

përfituese të fondeve të komunës në vlerë prej 13,500 € nuk kishte ofruar fare raport të shpenzimit të mjeteve, as raport financiar as raport narrativ edhe pse kjo gjë është obligim ligjor, mos dorëzimi i këtij raporti deshifron se kemi elemente të qarta të veprës penale. Po ashtu auditori ka gjetur vonesa, shkelej dhe tejkallim të afateve tek projekti rregullimi i zyrave të administratës së QKMF-së dhe rregullimi i oborrit të QKMF-së. Në fushën e kulturës auditori ka identifikuar në katër raste të subvencionimit të projekteve të DKRS në vlerë 18,000.00 € komisioni nuk ka përdorur formularët standard të vlerësimit siç kërkohet rregulloren bazë, kjo me falë tjera i bie se komisioni i ka ndarë mjete pa kurrfarë kriteri dhe pa formularë standard, ndërkohë akoma më keq tek projekti “ndërtojmë vetëdijen dhe zgjohemi kundër drogave” në vlerën prej 2500 € për pos që mungon formulari i vlerësimit përfituesi në këtë rast OJQ-ja kishte aplikuar dy ditë pas mbylljes së afatit, në këtë rast shtohet pyetja se si ka mundësi që dikujt ti ndahen para nga fondi publik pa konkurruar fare. Mandej auditori ka gjetur gjëra mjaft pikante edhe për sa i përket pronave publike në Komunën e Vushtrrisë, në tri raste të identifikuar shuma totale e borxheve të qirave ndaj Komunës së Vushtrrisë që nuk është pagur nga kontraktorët është 66,670 €, imagjimon të nderuar qytetar njerëzit shfrytëzojnë pronën e komunës dhe nuk i paguajnë asaj asnjë cent. Të nderuar qytetar të Komunës së Vushtrrisë, komuna jonë nuk kishte mundur të kishte një raport kaq të keq të nxjerr nga auditori i përgjithshëm, prandaj përsërit duke ftuar organet e drejtësisë që të merren me këto raste që janë shkelje flagrante, e me të gjitha këto shkelje menaxhementi i komunës është pajtuar.

Ymer Haradinaj, anëtar i kuvendit-tha se bazuar në raportet e auditimit, Komuna e Vushtrrisë ndodhet në një pozicion jashtëzakonisht negativ menjëherë pas Komunës së Prishtinës. Auditori i përgjithshëm ka gjetur se ka pasur pagesa të parregullta për furnizimime dhe punë në projektet kapitale, mungesa e projekteve detale ekzekutive për kontratat e punëve, parregullsi në procedurat e prokurimit publik, mos vazhdimi i sigurisë së ekzistimit për kohëzgjatjen e kontratës dhe mos ofrimi i garancionit bankarë për kualitetin e punimeve, mos pagesa e qirave mujore nga shfrytëzuesit e pronave publike, tejkallim i vlerave të kontratave për punë publike dhe furnizime nga vlerat e buxhetuara, parregullsi gjatë zbritjeve nga baza tatimore për pronat me banim parësor dhe nivel i ulët i inkasimit të hyrave nga pronat e paluajtshme, tejkallim të vlerës së planifikuar të shpenzimeve të kontrata me çmime të peshuara, parregullsi në procesin e vlerësimit dhe pranimit të aplikacioneve për subvencionim dhe mos përmbushje të kriterëve për fermerët, mos pagesa me kohë e obligimeve për kontraktuesit. Një tjetër gjetje e auditorit është edhe tek blerja e makinerisë, ku Komuna e Vushtrrisë ka blerë një autocisternë zjarrfikëse e përdorur e vjetër e viti 1995 në vlerë financiare prej 69,468.00 €, ndërsa në dosjen e tenderit ishte përcaktuar se viti i prodhimit nuk duhet të ishte më i vjetër se viti 1993. Komuna ka blerë automjet 28 vite të vjetër, në këtë rast komuna nuk ka respektuar udhëzimin administrativ nr.08/2019, që lejon përdorimin e automjeteve të vjetra deri në 15 vite. Kontrata për ndërtimin e fushave sportive dhe rrethojave në shkollë në vlerë prej 31, 498.00€, ishte realizuar me 45 ditë vonesë, ndërsa pranimit teknik nga ana e komisionit ishte bërë me 85 ditë vonesë. Kontrata për asfaltimin e rrugëve Vesekoc-Sllakoc në vlerë prej 110.000.00 € e nënshkruar me datë 08.11.2022 duhet të përfundonte brenda 60 ditëve, ndërsa projekti kishte përfunduar në muajin qershor 2023. Kontrata për projektin me kubza betoni në rrugën “Fehmi/Tahir/Istrefi” në vlerë 93,300 €, e nënshkruar më datën 06.07.2023, duhet të përfundonte brenda 65 dite, punimet nuk janë përfunduar brenda afatit për shkak të planifikimeve jo adekuate dhe nevojës për aneks kontratë. Kontrata për rregullimin QKMF-së në vlerë 36.500.00 € e nënshkruar më datën 22.08.2022 duhet të përfundonte brenda 45 ditëve, situacioni i parë ishte përfunduar më 31.03.2023, ndërsa pagesa e dytë në fund të vitit 2023. Këto dhe shumë të gjetura tjera, për ne si kuvend e sidomos për qeverinë komunale dhe kryetarin e komunës duhet të jenë

brengosëse, andaj kërkohet nga përgjegjësit të marrin masa ndëshkuese, ashtu që buxheti të shpenzohet në mënyrën më të mirë të mundshme dhe në të mirë të qytetarëve.

Refik Maloku, anëtar i kuvendit-përsërit të gjeturën e auditorit, ku ceket se testi i vlerësimit për pranim në punë nuk është e nënshkruar nga kandidatja e pranuar në punë në arsim, dhe a ka shkelje më të rënd se kjo, prandaj ai është i gatshëm të dëshmojë para organeve të drejtësisë dhe ata duhet të ftojnë përgjegjësit për të marrë përgjegjësit sipas ligjit.

Isuf Jashari, drejtor i DBF-së-duke ju adresuar kuvendit, njoftoj dhe sqaroi se ky raport nuk aprovohet nga ana e kuvendit, dhe shtoj se raporti i auditorit është hartuar në bazë të standardeve ndërkombëtare të kontabilitetit të sektorit publik, dhe mund të thuhet se që nga viti 2002 është hera e dytë që Komuna e Vushtrrisë merr një raport të kualifikuar për pasqyrat financiare të komunës. Më tej shtoj se përkundër çështjeve të theksuara dhe opinionit të kualifikuar, në faqen 3 të raportit auditori ka konstatuar mes tjerash se pasqyrat financiare të Komunës së Vushtrrisë për vitin 2023 paraqesin dhe prezantojnë një pamje të drejtë të saktë dhe të vërtetë në të gjitha aspektet materiale në përputhje me standardet ndërkombëtare të kontabilitetit të sektorit publik, sipas kontabiliteti dhe parimit të parasë së gatshme, dhe kjo është fundamentale për Komunën e Vushtrrisë. Auditori i ka parashtruar të gjeturat dhe i ka dhënë rekomandimet e tij, të cilat në bazë të planit do të adresohen për përmbushje. Ajo çka është tepër e rëndësishme është fakti se auditori në asnjë paragraf nuk ka konstatuar se ka pasur keq menaxhim, keqpërdorim dhe korrupsion në Komunën e Vushtrrisë. Ai ceku se numri prej 27 rekomandimeve të auditorit, ka qenë edhe në qeverisjen e kaluar dhe të njëjta nuk janë adresuar dhe një ndër to ka qenë edhe mos regjistrimit si aset objektit i Komunës së Vushtrrisë. Në fund tha se si rezultat i inflacionit të pagave nga kontrata kolektive e arsimit, ku janë marrë mjetet nga kategoria investime kapitale ka ndikuar edhe opinioni i kualifikuar i auditorit.

Lorik Maxhuni, drejtor i DSHPS-së-duke ju referuar fushës së shëndetësisë, sqaroi se nga raporti i auditorit është konstatuar si e gjetur subvencionit për HANDIKOS-in, në vlerë 13,500 €, ku ka munguar raporti i kësaj organizate, njoftoj se është ftuar përfaqësuesi i kësaj organizate z. Isak Hyseni i cili e ka sjellë raportin, por që siç duket ai nuk ka qenë bindës për auditorin dhe e gjetura është konstatuar, ai njoftoj se në ardhmen do të kujdesim që gjëra të tilla të mos përsëriten. Ndërsa sa i përket kontratës për projektin për rregullimin e oborrit të QKMF-së njoftoj se ka bërë përpjekje që të komunikoj me operatorin ekonomik, por që ky i fundit në është përgjigjur asnjëherë. Zt. Ramiz Mliqi, ka qenë menaxher i kontratës dhe bashkë kemi komunikuar, ndërsa në ndërkohë operatori ekonomik ka vendosur disa ulëse të cilat të njëjta nuk i kemi pranuar është bërë pagesa e një situacioni për punët që kanë qenë të pranueshme, për punët tjera nuk është bërë pagesa e situacionit dhe ka mbetur si rekomandim që menaxheri i kontratës të kërkohet që kjo kontratë të ndërpritet, dhe beson se deri me tani kjo kontratë duhet të jetë shkëputur.

Sylejman Mehulli, anëtar i kuvendit-e falënderoj drejtorin e Drejtorisë së Shëndetësisë për sqarimet korrekte dhe shtoj se Drejtoria e Shëndetësisë, ka pasur edhe ashtu shkelje me të pakta. Pastaj shtoj se drejtori z. Jashari, ka qasje të butë e të mirë, por gjendja nuk është e mirë, sepse opinioni i auditorit nuk ka ardhur si rezultat i keq klasifikimit për shkak të mjeteve që janë marrë, sepse keq-klasifikim ka pasur edhe në të kaluarën në komunën tonë edhe në komunat tjera dhe për këtë komuna nuk mund të fajësohet, por opinioni i kualifikuar i auditorit, ka ardhur si rezultat i shkeljeve tjera masive -materiale që kanë ndodhur në Komunën e Vushtrrisë e që janë konstatuar në raport.

Nasuf Aliu, anëtar i kuvendit- vlerësoi se Drejtori i Financave, nuk duhet të marrë mbi supet e tij krejt atë çka ka ndodhur, sepse ai nuk e mbanë atë përgjegjësi, ai apeloj të adresohen rekomandimet dhe raporti për vitin e ardhshëm të jetë i pakualifikuar.

12. Shqyrtimi i Raportit të Komisionit Komunal të Aksionarëve i N.P.L. “Përparimi” SH.A për vitin 2023.

Adnan Lahu, anëtar i kuvendit-tha se ky raport i ngjan më tepër një organogrami se sa një raport, sepse më tepër i referohet të dhënave përshkruese të strukturës organizative dhe numrit të të punësuarve. Në këtë kontekst shtoj dhe vlerësoi se Komisioni Komunal i Aksionarëve më e rëndësishme do të ishte të na prezantonte të hyrat dhe shpenzimet dhe financat të cilat i ka marr nga komuna, ku kësaj ndërmarrje Komuna e Vushtrrisë i ka ndarë më shumë se një milion euro, dhe në këtë raport është dashur të ceket se çfarë është bërë me ato financa ku kanë shkuar ato mjetet, si ka funksionuar ndërmarrja me këto mjetet të ndara. Si grup politik i LDK-së, gjithëherë e kemi përkrahur këtë ndërmarrje kur ka qenë çështja për ndarjen e mjeteve nga ana e komunës për këtë ndërmarrje. Ai shtoj dhe kërkoj llogari se ku po shkojnë këto mjete, sepse tani kemi ankesa se as mbeturina nuk janë duke u pastrua mirë, prandaj grupi kuvendar i LDK-së këtë raport si të tillë nuk mund ta përkrahin me votë.

Nasuf Aliu, anëtar i kuvendit-për dallim nga parafolësi i tij, vlerësoi se ky raport është më i strukturuar se sa i kaluari, për shkak se i njëjti përmban të dhëna mjaft të vlefshme. Tutje ceku se në faqe 14 aty ku flitet për shpenzimet e ndërmarrjes në vlerë mbi 1 milion euro, mungon tabela se ka janë shpenzuar këto mjete dhe cilat kanë qenë politika zhvillimore të ndërmarrjes. Pastaj ceku se tek çështja ku theksohet se është kontraktuar një kompani katër për auditim të jashtëm, pyeti se kush e ka përzgjedhur këtë kompani. Kjo kompani përpos përshkrimit të veprimtarisë së saj, nuk ka dhënë ndonjë konstatim lidhur me të gjeturat dhe zhvillimin e afarizmit të ndërmarrjes “Përparimi” dhe pyeti se me cilat procedura të prokurimit është kontraktuar kjo kompani me procedura të komunës apo të Ndërmarrjes “Përparimi”.

Sylejman Mehulli, anëtar i kuvendit-tha se ky raport që sot po shqyrtojmë do të kishte kuptim sikur Ndërmarrja “Përparimi” do të themelohej sot, po kjo ndërmarrje është themeluar para dy apo tre viteve. Kjo është kështu sepse në raport është përshkruar vetëm veprimtaria e kësaj ndërmarrje akti i saj i rregullimit të brendshëm, numri i punëtorëve e të ngjashme po kjo nuk i intereson kuvendit. Neve si kuvend na intereson funksionimi i ndërmarrjes, zhvillimi i afarizmit, shpenzimi i buxhetit e gjëra si këto të rëndësishme për zhvillimin e kësaj ndërmarrje. Ky raport voluminoz në faqe, është bërë me qellim që ikin temave kryesore ato të shpenzimit të buxhetit, dhe shtoj se si është blerë kamioni i vjetër 25 vite në kundërshtim me ligjin, duke i përshtatur specifikat saktë dhe duke e blerë kamionin prej të njëjtës kompani që janë blerë lulet, dhe kjo kompani fare nuk ka të bëjë me shitjen e makinerisë, po kjo çështje po dihet se qysh është bërë. Kjo tendencë për kamoflim të situatës, po e detyron grupin kuvendar të LVV-së që të kërkojë qasje në dokumentet zyrtare të Ndërmarrjes “Përparimi”. Në fund tha se ky raport është i pranueshëm dhe nuk do ta votojnë, ndërsa shtoj se i falënderon të gjithë punëtorët e ndërmarrjes për punën që po bëjnë dhe ceku se të njëjtit gjatë punës duhet të kursehen nga fotot dhe ekspozimi i tyre në rrejtët sociale.

Bekim Zabergja, anëtar i kuvendit-tha se ky raport është i kompletuar dhe mund të thuhet dhe konsiderohet si një punim shkencorë. Komisioni komuna i Aksionarëve të N.P.L. Përparimi, raportin e tij e ka mbështetur në nenin 8 të Ligjit për Ndërmarrjet Publike, në ç’rast e ka zbatuar me përpikëri obligimin ligjor për të raportuar para kuvendit. Tutje ka zbatuar obligimet ligjore që dalin nga neni 16 i Ligjit për Ndërmarrjet Publike, duke e zgjedhur drejtorët e ndërmarrjes publike, mbikëqyrjen e punës së tyre, caktimin e kompensimit të tyre, caktimin e komisionit të auditimit, caktimin e dy mbikëqyrësve të komisionit të auditimit, aprovimin, plotësimin ndryshimin e rregulloreve të përgatitura nga kryeshefi i ndërmarrjes publike, raportet tremujore, raportet vjetore, raportet për përbushjen e nevojave të klientëve, vlerësimin e efektshmërisë të bordit të

drejtorëve, zbatimin e detyrave fiduciare, zbatimin e planit të biznesit, zbatimin e planit të shpenzimeve të biznesit si dhe auditorin e jashtëm. Ndërmarrja Lokale “Përparim” këtë tri vite prej se është themeluar falë punës së mirë të kryeshefit ekzekutiv dhe udhëheqjes profesionale, ka zgjeruar dy veprimtari shumë të rëndësishme dhe fitimprurëse siç është njësia për ndriçimin, mirëmbajtjen e hapësirave publike dhe shërbimet për mbledhjen e mbeturinave. Para realizimit të këtyre veprimtarive, kryeshefi ekzekutiv ka ndërmarr të gjithë hapat ligjor për licencimin e ndërmarrjes sipas rekomandimeve të Ministrisë së Mjedisit, Planifikimit Hapësinorë dhe Infrastrukturës si dhe pajisja me leje mjedisore nga ana DUMM-së. Duke përfshirë ndryshmet dhe hartimin nga komisioni i aksionarëve e më pas nga bordi i drejtorëve ku përfshihet realizimin e të gjitha kontratave për furnizime me mjete të punës, vegla të punës, për pajisje, për materiale të ndryshme, për uniforma me procedura të hapura të pranuar nga komisioni vlerësues dhe të raportuara në E-prokurim, ku secili nga ne mundet të ketë qasje dhe të informohet. Çështja tjetër më rëndësi që duhet të theksohet është se punëtorët përpos pagesë marrin edhe kontributin pensional-trusitn, sigurimin shëndetësor dhe çka është edhe më e rëndësishme, punëtorëve të terrenit iu kompensohen edhe orët shtesë dhe kujdestarinë dhe tani numri i punëtorëve nga 193 është rritur në 295 punëtorë, ku 75 prej tyre janë transferuar nga K.R.M “Uniteti”. Gjëja më e rëndësishme që duhet cekur është se kryeshefi i KRM “Uniteti” në mënyrë të njëanshme e ka bërë shkëputjen e kontratës duke ia ndaluar NPL “Përparimit” zbrazjen e mbeturinave në deponinë e mbeturinave në Germov në fshatin Kushtovë me tendenca për dëmtimin e Komunës së Vushtrrisë, dhe kësaj ka rrezikuar 17,000.00 ekonomi familjare mbi 1300 biznese dhe ka rrezikuar të lërë pa shërbime për pastrimin e mbeturinave për 70,000.00 banorë të Komunës së Vushtrrisë. Kryeshefi ekzekutiv i NPL “Përparimi” ka arritur marrëveshje edhe me 5 deponi tjera të mbeturinave në ç’ rast tani Komuna e Vushtrrisë i zbrazë atje mbeturinat. Marrëveshja e re kontraktuale me deponit tjera financiarisht është më e favorshme ku NPL Përparimi brenda një viti kalendarik i kursen rreth 36,000.00 €. Mandej tek bilanci përfundimtar të hyrat kanë qenë 1,189,114.89 €, shpenzimet 1,100,456.38 €, kurse fitimi 43,384.95 €. Në fund tha se kur diskutojmë dhe kritikojmë nuk duhet të jemi të njëanshëm sepse anëtari i Komisionit të Ndërmarrjes “Uniteti” që vjen nga radhët LVV-së, ka sjellë para kuvendit një raport skandaloz dhe të cilin ne i kemi refuzuar, për më keq ai ka refuzuar ti përgjigjet kuvendit si organ themelues i atij komisioni, dhe ai nëse nuk e ofron raportin, ai do ti ngritë kallëzim penal.

Jeton Gjaka, anëtar i kuvendit-pyeti se përse nuk po iu kompensohen shujtat punëtorëve teknik dhe të sigurimit që janë në kuadër të Përparimit e që punojnë nëpër shkolla.

Mentor Ferizi, anëtar i kuvendit-pasi falënderoj kuvendin për ofrimin e mbështetjes për NPL “Përparimin” sqaroi se kjo ndërmarrje është themeluar në vitin 2021 por që e njëjta në atë kohë nuk ka pasur makineri punuese edhe pse qeverisja e kaluar ka pasur për obligim që këtë ndërmarrje ta bëjë të gatshme për operim. Ai ceku dhe sqaroi se falë mbështetjes nga ana e kryetarit të komunës dhe nga ana e kuvendit, menaxhmenti i ndërmarrjes ka bërë hartimin e planit të biznesit dhe ka zgjeruar gamen e shërbimeve që ofron të cilën e kemi gjetur me vetëm tri shërbime. Si rezultat i këtyre zhvillimeve është bërë ngritja e të hyrave të ndërmarrjes dhe janë ngritur edhe pagat për punëtorët e kësaj ndërmarrje. Aktualisht ndërmarrja është në rrugë të mbarë në zhvillimin e saj të gjithmbarshëm dhe kjo falë edhe mbështetjes nga ana e kryetarit të komunës dhe kuvendit. Ndërmarrja është në drejtim të mbarë që të krijoj një sistem dhe politikë të drejt si dhe stabilitet financiar në zhvillimin e kësaj ndërmarrje.

Qemajl Hasani, anëtar i Komisionit të Aksionarëve- paraqiti sqarimet lidhur me zhvillimin e manaxhimit të Ndërmarrjes Lokale “Përparimi” dhe për politikën e saj zhvillimore, duke shprehur gatishmëri për qasje në dokumentet zyrtare për shpenzimin e parasë publike në këtë kompani.

Në fund të debatit lidhur me këtë pikë të rendit të ditës, kuvendi pas votimit me 12 vota “për” 11 vota “për”, të tjerët nuk morën pjesë në votim, nuk e aprovoj raportin e Komisionit Komunal të Aksionarëve të N.P.L. “Përparimi” SH.A, për vitin 2023.

13. Shqyrtimi i kërkesës për ofrimin e mbështetjes financiare për Klubin e Hendbollit “Samadrexha” F.

Sylejman Mehulli, anëtar i kuvendit-tha se ashtu sikur edhe në Komitetin për Politikë dhe Financa, edhe në këtë mbledhje të kuvendit, e përkrahim kërkesën për mbështetje financiare për Klubin e Hendbollit “Samadrexha” F, jemi shumë të kënaqur dhe krenar që ky klub ka korrë rezultate dhe suksese të mira për përfaqësim në gara ndërkombëtare. Prandaj i uroj suksese të mëtejme këtij klubi dhe deklaroi se do ta përkrahin si grup kuvendar këtë kërkesë.

Adnan Lahu, anëtar i kuvendit-tha se është mirë që po përkrahet ky, klub dhe shtoj se iu uron suksese këtij klubi, po ashtu i vjen shumë mirë që kryetari i komunës e i ka pritur në takim kryesin e klubit. Ai propozon që vlera e mbështetjes financiare për këtë klub të rritet nga 30,000.00 € sa është të bëhet 40,000.00 €, për shkak të kërkesave dhe nevojave të klubi dhe për shkak të rritjes së shpenzimeve të udhëtimit dhe akomodimit për klubin që do të ketë në ditë në vijim në gara ndërkombëtare.

Isuf Jashari, drejtor i DBF-së-sqaroi se çdo vendim që merret duhet të rishikohet dhe revidoet plani i Drejtorisë së Financave se ku do të merren mjetet financiare.

Agron Përçuku, anëtar i kuvendit-deklaroi se nuk merr pjesë në votim sepse konsideron se ka konflikt të interesit.

Në fund të debatit lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim ofrohet përkrahje financiare në shumë tri dhjetë mijë euro (30,000.00 €), për Klubin e Hendbollit KHF “Samadrexha” në Vushtrri.

2. Mjetet financiare të cekura si në pikën paraprake të këtij vendimi, do të sigurohen nga buxheti i komunës – kategoria subvencione dhe transfere, kodi i programit (850) i Drejtorisë për Kulturë, Rini dhe Sport. Në mungesë të mjeteve në këtë drejtori, do të sigurohen nga njësitë e tjera buxhetore, ku ka mjete të lira.

3. Për zbatimin e këtij vendimi obligohet Drejtoria për Buxhet dhe Financa si dhe drejtoritë tjera kompetente komunale.

4. Ky vendim hyn në fuqi pesëmbëdhjetë (15) ditë pas regjistrimit në zyrën e Protokollit në Ministrinë e Administrimit të Pushtetit Lokal si dhe shtatë (7) ditë pas publikimit në faqen zyrtare të Komunës së Vushtrrisë.

Mbledhja përfundoi në ora 17:00

Bastri Duraku


Procesmbajtës

Melihate Basholli-Latifi


Kryesuese e Kuvendit

